



Sujet 2010: SKULPTUREWÄÄG LIESCHTEL

Mir bringe der Skulpturewääg in die fümfti Jooreszyt!

Lieschtel het e Skulpturewääg, vo der Cheddite über d Windetalhööchi bis zum Uussichtsdurm präsentiere 46 Künschtlerinne und Künschtler mit verschiidene Darstellige die 4 Jooreszyte.

Jetzt isch Fasnecht, jetzt isch es sowyt, mir präsentiere die fümfti Jooreszyt.

Euse Wääg goot vom nöie Baanhofblatz über d Poschtstrooss, Wasserdurmbplatz zum Töörliblatz, denn d Kanonegass ab und ums Züüghuus umme via Amtshuusgass in d Roothuusstrooss. Du merksch vilicht, do isch öbbis los!

Fange mir bym nöi gstartete Baanhofblatz a, muesch jetzt nümme so vill Bammel ha. Es faare zwar immer no es baar Auto duure aber trotzdem chasch jetzt uf däm Blatz no besser schnuure.

Der nöi Poscht-Parkblatz weer jo wirklich tholl, numme wenn mer chömme isch er meischtens scho voll. Nit wäge de Poschtchunde mit de Nümmerli, nei s isch wäge dä MacDonalds-Bsuecher wo hei e chly Hungerli.

In der nöie Poschtstrooss chasch jetzt näbe Bäum duure laufe und in aller Rueh überlegge, was de im Stedtli wetsch chaufe. D Läärmschutzwänd entlang vo de Schiine si schynt nit sone Hit, wylls halt glych immer no vill Lääreme git!

Und scho simmer bym Wasserdurmbplatz, au dä chunnt jetzt draa, dä Früüelig fönge si äntlig a. Nach der Nöigstaltig faare denn d Būs im Geegevercheer zwüsche dä Bäum duure, do heis aber d Schofföre schweer.

Bym Töörliblatz göngemer blitzartig duure sunscht chunnt no der Felix cho schnuure. Dä stellt jo meischtens vor sym Huus au sone Art Skulpture uf.

Ab durs Töörl in d Kanonegass gönge mir go luege, wies dort uugseet nachem Planiere. Und mir merke bald, do chasch jetzt so richtig flaniere. Wäärend der ganze Bouzyt hei d Chrämer uf d Zään müesse bysse. Der Tabak-Pauli het im Färnsee gschumpfe jede Daag syg sy Kasse meer am Schrumpfe. Mir finde die Gass jetzt wirklich tholl und langsam wärde au d Kasse wiider voll!

Und zum Schluss no ums Züüghuus umme, dort loot e Künschtler Töön, Gspröoch und Grüesch lo brumme, do chunnsch dir vor wiene Dumme.

Aber jetzt ab dur d Amtshuusgass näbenem leere Amtshüüsl duure in d Roothuusstrooss, do wird noni bout, es isch sowyt mir präsentiere und gniesse die fümfti Jooreszyt!

Wie allewyyl isch am Fasnechtszyschdig d Ladäärne-Uusstellig in der Roothuusstrooss vom zwöi Zmidaag bis am nüüni Zoobe!